



Be bunas notas han ils experts dal magazin «Graubünden geht aus» dà ad Anderas Caminada, actualmain in dals megliers cuschiniers da la Svizra.

KEYSTONE

Noss chantun in parvis per gourmets

Il nov magazin per gourmets «Graubünden geht aus» è cumparì

DA GION NUTEGN STGIER / ANR

■ Ina societad illustra da la gastronomia è stada da la partida tar la vernissascha dal nov magazin per tut las persunas che mangian gugent bain. Experts cun buccas finas han valità la cuschina da 120 restaurants en noss chantun. Tranter ils megliers da quels er bunas adressas en Surselva ed en Engiadina. Senza dubi è il «Gault Milano» en Svizra anc adina la bibla per ils gourmets er sche ils experts da quella spargnan betg cun critica ed en na adina uschè objectivs. Las persunas cun in nas fin e cun buccas anc pli finas, che guardan als cuschiniers sur las spadlas per lura scriver en il magazin «Graubünden geht aus», visitan bain er anonim ils restaurants, dantant èn ils criteris da valitaziun auters. Els vulan plitost animar persunas dad ir ordaifer a mangiar, els vulan far attent a bunas adressas e recumandar las tratgas finas dals cuschiniers e dals restaurants. Ils experts èn davairas betg quels che vulan crititgar, mabain plitost ludar ils cuschiniers inclus lur products.

Chattà 49 novas adressas

Ils davos 12 mais han *Wolfram Meister*, il redactor principal ed ils experts visità bunamain 150 restaurants da Sedrun fin Müstair. A la fin han els fatg la schelta e tschernì quellas 120 bunas adressas che meritan da cumparair en la quarta ediziun dal magazin «Graubünden geht aus». Gist 49 novs restaurants èn vegnids tiers da nov quest onn. Tranter quels 49 buns locals per mangiabains sa

chattan gist 26 restaurants da regiuns rumantschas da noss chantun. Lain gist numnar intgins da quels restaurants en Engiadina ed en Surselva: Talvo, Champfèr, Saluver Schlarigna, Stüvetta, Valchava, Murütsch Segl Baselgia, Traube, Scuol, Crusch Alba, Guarda, Ustria Miracla, Breil e Casa Tödi, Trun. Anc adina nagin paradì per persunas cun buccas finas è Surses cun figurar be «La Veduta» Beiva en la nova ediziun dal magazin cun 200 paginas. En Val Alvra è la gastronomia segir da meglra qualitat e gist a Lai han ils experts scuvert bunas adressas.

Casa Alva e Crusch Alba

Gist il pli sensum en la rangaziun sa chattan dus restaurants da dus vischnancas pli pitschnas. La «Casa Alva» Trin è er per ils experts da «Graubünden geht aus» naging tip secret pli. La cuschina excellenta

da *Corsin Pally* savess strusch esser pli fina e l'ospitanza da l'ustiera *Lucia Monn* dat lura la dretga noda a la visita en la «Casa Alva» a Trin. Avant in onn figurava quel local anc sin il quart post en la categoria ustrias da vischnanca ed ussa da nov sin plaz in. Intgantads en ils experts lura stads da la cuschina excellenta da la «Crusch Alba» a Guarda. Cun *Sina e Didì Gapp-Caprez* haja l'ustaria retschet in rinfrestgament e quai er quai che pertutga las tratgas che vegnan servidas. A Flem tar la vernissascha da la pli nova ediziun da «Graubünden geht aus» en l'hotel da luxus «Waldhaus» è er vegnì servi be il pli bun dal pli bun e tuttina han tuts preschents be spetgà da tegnair finalmain en maun il magazin, ch'è davairas in product interessant betg be per persunas che gaudan tratgas finas e tratgas simplas, mabain er per tuts quel che vulan daventar gourmets.

Ils megliers da mintga categoria

| Categoria | Num dal restaurant |
|--------------------|---------------------------------|
| Gourmets: | Schauenstein, Fürstenau |
| Bella vista: | Bellavista, Surlej |
| Cuschina da chasa: | Falknis, Maiavilla |
| Frestg e creativ: | Ecco on Snow, Champfèr |
| Sper las pistas: | Kuhstall, Segl Maria |
| Talians: | Osteria Murütsch, Segl Baselgia |
| Asiat: | Ahaan Thai, San Murezzan |
| Tradiziun: | Süsswinkel, Cuira |
| Vins exclusivs: | Mann& Co, Tavau |
| Dal vitg: | Casa Alva, Trin |
| Buna cuschina: | Crusch Alba, Guarda |



Ospitants excellents èn stads il director e la directura sco er ils cuschinunzs dal Waldhaus a Flem: (da san.) Sandro Zinggeler, Sandro Steingruber, Urs Grimm, Marko Molle, Bruno Hurter e Yasmin Cahemaille Grimm.



Il moderatur da la saira Rainer Maria Salzgeber (san.) en discurs cun Bruno Hurter, il schef da cuschina dal «Waldhaus» Flem.

FOTOS G. N. STGIER



In expert per tratgas finas cun in dals megliers cuschiniers dal Grischun: (da san.) Stefan Walter, stizun «vom Fass» Cuira e Klaus Blümel, «Kornplatz» Cuira.



A la saira da gala a Flem èn er stads ils ustiers dal «Central» Sursaisa, Ursula e Sigi Caduff.



Er tranter ils megliers restaurants dal Grischun tutga il «Fidazerhof» Fidaz cun ils ustiers Roland Häfliger ed Antonia Schärli.



Therese e Linus Arpagaus, dapi diesch onns ospitants da vaglia a la «Casa Fausta Capaul» Breil.